



Jumat, 5 Juli 2024

Ogen : 1 Timotius 6:17-19



MERE ALU MELUMBAR



Lit dua macam kebayaken, Ssda kebayaken si ersangkutanen ras materi, em si igelari erta ntah pe kebayaken doni, si peduaken e me kebayaken pertendin. Si dua e labo petembil adi siangka palas ras tujun kebayaken e banta.

Senina ras turang, Tuhan erpadan mereken kecukupen man anak-anakNa. Man piga-piga kalak bereken Tuhan ka lebih asa cukup, bayak secara doni. I Efesus mbue kalak si bayak. Tapi i bas si e lit ka biakna meganjang ukur ras ernalem man kebayakenna. Lebih kal jadi atena nandangi duit. Tempa-tempa duit e me si perluna, si pentingna dinggen siutama i bas geluhna. Gelemna kal duit e. Kalak si bage biasana lit ka biakna pelit, erkira i bas erbahan si mehuli man teman manusia bage pe man Dibata. E maka isuruh Paulus si Timotius si paksana ngelai i Efesus guna mpersingetisa kalak bayak ndai gelah min la terjeng bayak secara doni tapi bayak pe secara pertendin. Bayak secara pertendin e, teridah i bas kininggiten erbahan si mehuli, erpemere dinggen nggit ngeripe, tek man Tuhan.

Kalak melumbar mere man manusia terlebih man Dibata, ncidahken maka i bas dirina nggo sikap palas si paguh. Kristus enggo mate, iendeskena darehNa si meherga guna keselamatenna jine. Barang doni enda pe bas Tuhan nari nge rehna. Adi ate Tuhan iberekenna seh sampur lumbungta, menukah akapSa, tapi muatca pe labo banNa ndekah adi la kita setia. I bas persikapen guna kerja rani marilah si gejab penebusen Tuhan e, la tergalari alu erta doni, tapi alu erta tendi.

 *Melumbarlah Mere Maka Kam Rehi Bayakna*

